

AKASHVANI AIZAWL

REGIONAL NEWS BULLETIN

Date – 07/06/2025 Time - 18:30 -18:40Hrs

HEADLINES (EVENING)

- Sorkar laipuiin nu leh naute hriselna atana hma a lakna hrang hrang te chu National Health Mission (NHM) chuan Mizoramah hlawk takin a hmang mek.
- Ram chhung hmun danga Covid-19 hri leng a pun leh mek lai-in Mizoram chu hri kai 2 chauh la awmin an dam ve ve tawh.
- .
- Prime Minister Narendra Modi chuan ramchhunga loneitute hamthatna turin theihtawp a chhuah a ti.
- Ramchhunga mi rethei lehzual maktaduai 269 chu khaichhuah an ni tawh niin World Bank chuan a sawi.

<><><>

11 YEARS OF MODI GOVT. (HEALTH)

Sorkar laipuiin nu leh naute hriselna atana hma a lakna hrang hrang te chu National Health Mission (NHM) chuan Mizoramah hlawk takin a hmang mek.

Nau neih lawmman - Janani Suraksha Yojana (JSY); Damdawi Ina nau neih senso atana pawisa an pek Janani Shishu Suraksha Karyakram (JSSK) leh nau pai ni 9 a en ni - Pradhan Mantri Surakshit Matritva Abhiyan (PMSMA) te chu Mizo mipui ten an hlawkpui hle.

Akashvani zawhna chhangin NHM Mizoram State Consultant (Maternal Health) Dr. C. Remsangpuii chuan, Reproductive and Child Health (RCH) programme chu NHM hnuaiah kalpui a ni tih a sawi a. Nu leh naute hriselna atan hmalakna tam tak a awm tih sawiin, nau pai lai, nau neih lai leh neih hnu bakah naute kum 5 an tlin thlengin damdawi a thlawn a sem te, nau neih lawmman bakah nau neihna senso leh naupang kum 1 hnuai lam damlo tan sorkar Damdawi In-ah senso tlem thei ang berin inenkawl theih a ni, a ti.

Mizorama mipui tam tak chu thingtlanga awm an ni a, khawpui angin thingthlangah chuan mimal Damdawi In a awm meuh lo a, Dr. C. Remsangpuii chuan, thingthlangah chuan mipui ten sorkar Damdawi In chauh pan tur an neih avangin sorkar laipui hmalakna hrang hrang te chu a tangkai zual hle niin a sawi bawk.

Nu leh naute tana hmalakna bakah hian, naupang tan rulhut do beihpui, khawthalo do beihpui leh pneumonia do beihpui te thlak a ni thin bawk a, henge hi ram chhung mipui ten an chhawr tangkai hle a ni.



EID UL-ZUHA

Aizawl-a Muslim awmte chu an sakhaw hun pawimawh Eid ul-Zuha pualin vawiin khan Vaivakawn Joint YMA Field-ah a huhovin an tawngtai.

Aizawl Mosque Committee leh Muslim Welfare Society General Secretary, Mamon Majumdar-a chuan Eid ul-Zuha pualin Mizoram mipui zawng zawng chibai a buk a. Ram ralmuang tak hnuiaa Mizorama Muslim sakhaw zuitute thlamuang taka an awm theihna-ah sorkar leh Mizoram mipuite chungah lawmthu a sawi a. Muslim Welfare Society din a nih atangin Muslim leh a ram mipui te inkarah boruak tha lo a awm ngai lo a, chutiang boruak chu chawinung zel turin kalkhawm te a chah a.

Mizorama Muslim awmte chu dan in a phut angin ILP dik taka kalpuia nei turin a hrilh a. Mizoram mipuite atanga zir tur leh entawn tur tam takte chu zawm tur leh Mizorama kohhran, tlawmngai pawl hrang hrang leh Mizorama sorkar te nen thawhhona tha tak an kalpui thei a tun hun an hmang thei chu lawmawm an tih rualin, tunhnai-a khuarel chhiatna avanga nunna chan 5 te chu an tawrhpu thu leh a rang lama CM Relief Fund a sum thawh an tum thu pawh tarlangin, I'd Ul Zuha pualin Mizoram mipui zawng zawng te duhsakna a hlan tih a sawi a ni.



COVID-19

Ram chhung hmun danga Covid-19 hri leng a pun leh mek lai-in Mizoram chu hri kai 2 chauh la awmin an dam ve ve tawh.

Kumin chhungin vawiin thleng hian Covid-19 hri an kai leh kai loh mi 231 endik an ni tawh a. Aizawl district-ah mi 2-in an kai tihhmuhchhuah a ni a, hri kai 2-te hi Mizoram pawnah an zin lo ni a hriat a ni a, May ni 28 a hmuhchhuah kha an ni. June ni 5 khan enkawl an nihna hmun Zoram Medical College & Hosipital atangin damin an chhuak tawh a. Anni hnu-ah hian mi engemaw zat sample endik leh tawh a ni chungin Covid-19 hri kai hmuhchhuah belh an awm leh tawh rih lo a ni. He ti chung hian Integrated Disease Surveillance Programme (IDSP) chuan ramdang leh ramchhung hmun dang dinhmun thlithlai chung leh Ministry of Family Welfare leh Indian Council of Medical Research (ICMR) nen inbe pawp reingin Covid-19 hri len dan an ngaihven reng a. A tul ang anga che thei turin ruahmanna siam a ni a, mipui tan chi-aina tur a awm lo niin IDSP hotute chuan an sawi a ni.

Kum 2020 bul lama Mizoram a Covid-19 hri kai hmuhchhuah a nih ve tan atanga tun thleng hian hri kai leh kai lo sample nuai 19, sing 9, sang 7 leh 565 endik a ni tawh a, chumi zinga nuai 2, sing 3, sang 9 leh 637 chuan hri an kai tih hmuhchhuah a ni a, an zinga mi 734 chuan nunna an chan phah a. Mi nuai 2, sing 3, sang 8 leh 903 chu enkawl dam an ni. Thite hi hri kai atanga za zela 0 point 3 an ni. He hri len tan tirh kum 2020 khan hri leng avangin mi 8 an thi a, an thih tam ber kum 2021 khan mi 538 an thi a, a kum leh 2022 khan mi 180 an thi a, kum 2023 khan mi 8 an thi leh a. Nikum chhung khan hri kai mi 73-in hri an kai chungin nunna chan phah an awm lo a ni.

<><><>

BJP

BJP Mizoram chuan Central Sorkarin Pradhan Mantri Garib Kalyan Anna Yojana kaltlanga, Ration Card AAY te leh PHH te tan tun June thla ration sem hun atana Buhfai thla 3 ei tur sem lawk tura a ruahmanna a siam chu kuthnathawktute, mi harsa zawkte tana an ruahman hi lawmawm an tih thu an sawi.

Mizorama khaw tam tak chu fur ruahtui tlak tam avanga inkalpawhna kawng ping thut awm thei a ni thin bawk a, chuvangin fur pui a thlen hmaa Buhfai an lak lawk theih chuanmipui-in buhfaia harsatna an tawh theih tur tam tak lakah a chhawk ngei dawn a ni an ti a. Mipui tana awlsamna siamsaktu Prime Minister Pu Modi-a chungah lawmthu an sawi a. Hetianga central sorkarin hma a lakna hi Mizoram Sorkar tan pawh a thawven thlak hle dawn a ni, an ti. BJP Mizoram chuan hei mai bakah hian ration card var (Non-NFSA) neite pawh central sorkar pek nghak lo a, furpui lo thlen tak tak hma ngei a thla thum ration pe ve turin Mizoram sorkar an phut a. Midangte tihmuhtu-ah tanga mipui tana hma la turin Mizoram sorkar an phut thu an tarlang bawk a ni.

<><><>

LAWNGTLAI DISASTER

May 30 zana Lawngtlai Bazar leh Chandmari a in rellai pahnih tiama in 7 chim a bungrua senghawi hna chu zawhfel thawhkhat a ni tawh.

Tun dinhmunah bungrua la senghawi loh awmte chu in chimin a delh beh nasatna lai amite niin, a nawlpui ang chuan hnatlanga thawh hleihtheih a ni tawh lova. Fimkhur takin a theih ang angin Inchim senghawi hna hi vawiin lamah pawh thawh chhunzawm a la ni. Lawngtlai patlangtu National Highway-02, in chim avanga ping mek pawh vawiin tlai lam hian lirthei kaltlang theiha sial tlang hman beisei a nih thu tlawmngaipawl hruaitute chuan an sawi a. Hetih lai hian in chim vanga Lawngtlai DC Office, District Hospital, Police Station leh Sorkar Pisa pawimawh tamzawk awmna Bazar Veng leh Chandmari atanga panna kawng chim tel pawh a theih ang angin sialtlang tumin vawiin atang khan thawh tan a ni bawk. Bazar Veng leh Chandmari veng khawtlang hruaitute chuan an veng huamchhunga vanduaiana a thlenga sum leh pai, tha leh zung leh kawng hrang hranga tanpuitute chungah lawmthu an sawi a ni.

(Lalnggheta Ralte, PTC Lawngtlai)

<><><>

11 YEARS OF MODI GOVT. (SPORTS)

Prime Minister Narendra Modi kaihhruai sorkar kum 11 chhunga hmalakna hrang hrang zingah - Khelo India State centre of Excellence (KISCE) chu Mizoramah pawh hlawhtling taka kalpui mek a ni.

Olympic 1992 leh Olympic 1996 thalkah (Archery) huanga India aiawhtu, tuna Mizoram State Sports Council Joint Director Pu Lalremsanga chuan, sorkar laipuiin Khelo India a kalpui chu Mizoram in hma a sawn pui hle tih a sawi a, a bik

takin thingtlang lamin tun hnaiah hma an sawn nasat phah tih sawiin, tun hma lama khawpui mi an tluk hleih theih loh pawh an elphak tawh tih a sawi bawk.

Mizoramah chuan coach leh infiammi ten an awmchilh theihna - Khelo India State centre of Excellence (KISCE) hi kum 2021 khan bul tan a ni a. Mahse hripui leng (Covid-19) vangin a tir lamah harsatna a awm a, kum 2022 October thla atangin mumal zawka kalpui a ni. Mualpui, Aizawla Rajiv Gandhi Stadium-ah Boxing, Judo leh Weightlifting ten bul an tan a, heng infiamna huangah hian naupang 10 theuhin training an nei.

Youth Olympic 2018 Goldmedalist Jeremy Lalrinnunga pawh lo chher chhuak tawhtu, Mizo weightlifting coach Malsawma Khiantge chuan Khelo India State centre of Excellence (KISCE) chu Mizo infiammi ten an hlawkpui hle tih Akashvani a hrih a, Mizoram mai ni loin India huap pawha medal lak theih phah an awm tih a sawi.

Aizawl bakah hian Mizoram chhunga district hrang hrangah Khelo India hi kalpui a ni a, sorkar laipui hmalakna hnuaiah hian - Football, Boxing, Badminton, Judo, Wrestling, Weightlifting, Taekwondo, Hockey, Archery leh Table Tennis-ahte training an kalpui thin a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM

Prime Minister Narendra Modi chuan ramchhunga loneitute hamthatna turin theihtawp a chhuah a ti. NDA kum 11 sawrkar chhunga loneitu thawkrim tak takte rawng a bawlsak thei chu a inchhuan thu a tarlang a. Sawrkarin hmalakna a kalpui chi hrang hrangte chuan loneitute sum lakluh a tihpun bakah agriculture sector lamah inthlak danglamna tam tak a thlen a ti a. A sawrkar chuan leilung hriselna soil health leh irrigation a ngai pawimawh tih sawiin hei hian hlawkna tam tak a thlen tih a tarlang bawk a ni.

.



POVERTY

Ramchhunga mi rethei lehzual maktaduai 269 chu khaichhuah an ni tawh niin World Bank chuan a sawi. World Bank data thar berah chuan kum 2011-12 leh 2022-23 inkarah extreme poverty rate chu nasa taka tlahniamin kum 2011-12 ah zaa 27.1 atangin 2024-25 ah zaa 5.3 ah

a tla hniam tawh a ni. Kum 2011-12 ah khan mi maktaduai 344.47 chu extreme poverty ah chhiar an ni a, Kum 2022-23 ah erawh chuan maktaduai 75.24 ah a tlahniam tawh thung a ni.

<><><>

NDA 11 YEARS

Prime Minister Narendra Modia kaihhruai NDA sawrkar chuan kum 11 hmel a lo hmu ta a. Hemi chhung hian India chuan kawng tam takah hmasawнна a nei a ni.

SFX

Kum 10 chhungin India rama agriculture sector lamin hma a sawn nasa hle a. Hmathlir tha tak Beej se Bazaar Tak, thlai chi thlak atanga bazara hralh thlenga buaipui an ni a. Sarwkar chuan agriculture atan budget a let nga laia ti pungin kum 2012-14-a cheng vaibelchhe sing 2 sang 8 atangin 2024-25 ah cheng vaibelchhe 1.37 ah tihpun a ni a. PM-KISAN hnuaiah loneitu vaibelchhe 11 chuangin cheng vaibelchhe nuai 3.7 an dawng tawh a ni.Kum 10 chhungin ramchhunga thil thar chhuah nasa takin a pung a. Thlai, bawngnhnute, sangha thar chhuahte a let 10 dawnin a pung a ni.

<><><>